

Uunga siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasagaatit pillugit Inatsisartut inatsisaat nr. xx, xx. xxx 2018-imeersoq
(Ineqarnermut Attaveqatigiinnermullu Naalakkersuisoq)

Akissuteqaat

(Ineqarnermut Attaveqatigiinnermullu Naalakkersuisoq)

Pingajussaaneerineq

Ullumi ulloq oqaluttuarisaanermi pingaaruteqarpoq. Kalaallit Nunaata oqaluttuarisaanerani attaveqatigiinnermi aningaasaliinerit annertunersaat isummerfigissavarput. Siunnersuutip matuma akuerineqarnerani, maannakkut attaveqatigiinnermut sanilliullugu angalasut amerlanersaannut annertuumik pitsanngoriartoqassaaq. Innuttaasut illoqarfinni allani ilaqquttaminnut tikeraartussat, nunatta iluani aammalu nunani allani sulillutik angalasut, minnerunngitsumillu takornariat maannakkut siunissamilu nunatsinni isorartoorsuarmut tikeraartartussat tassani pineqarput. Tunngavilersuutaalluartut akornanni pingasut aalajangersimasut, aammalu siunnersuummi malunnaatilimmik iluaqutissartaqartut Naalakkersuisut taasinnaavaat:

- 1) Angalasut amerlanerpaartaat Nuummukartuusarput imaluunniit Ilulissanukartuusarlutik. Nuummi aamma Ilulissani 2.200 meterimik mittarfiliornermi angalasut amerlanerpaartaat ornigassaminnut toqqaannartumik apuunnissamik periarfissaqalissapput. Taamaaliornermi piffissaq sivikinnerusoq aningaasallu ikinnerusut atortassavaat.
- 2) Angalasut Kujataanukartussat 50 procentiissa missaat Qaqortumukartussaasarput. Qaqortumi 1.500 meterimik mittarfiliornermi angalasut taakkua akunnillutik mittariaarutissapput, taamaattumillu piffissap angalaffigisamik sivikinnerulernera aamma angalanermut aningaasartuutit ikinnerulerneru misigissallugu.
- 3) Mittarfiit nutaat pingasut taakkua illoqarfinnut pingasunut toqqaannartumik angallattoqalernissaanut ammaassissapput. Tamanna timmisartuni anginerusuni ilaasut amerlanerulernissaannut periarfissaqalersitsissaaq, taamaalillunilu billetsit akiisa akikinnerulernerannik malitseqarsinnaassalluni kiisalu takornariatitsisarnermi inuussutissarsiornermilu periarfissaqarfiusut nutaat ammaatissallugit.

Tamatuma saniatigut ingerlatseqatigiiffiit timmisartumik angallassisartut, nunanit qanitatsinniittunit imarpik qulaallugu mittarfissatsinnut angallavinnik nutaanik pilersaarusiornissaat takorloorneqarluarsinnaavoq. Tamanna pissappat periarfissat nutaat ammaanseqassapput – innuttaasunut aammalu inuussutissarsiortortatsinnut.

Siunnersuut aamma allatut oqaluttuarisaanermi pingaaruteqarpoq. Mittarfiit pioreersut tallilernerqarnissaat aammalu nutaanik mittarfiliornissaq ukiuni qulikkaani oqallisigineqarpoq. Siunnersuutip matuma akuerineqarnerani oqallinnermi tassani kapitali pingaaruteqartoq naammassineqartussaavoq, taamaalillunilu attaveqaqatigiinnermi, inuussutissarsiornermi takornariartitsisarnermilu nutaamik aningaasaliinissamut tunngavissat pitsaasut pilersinneqartussaallutik.

Aningaasaliinerit taakkua aamma Naalakkersuisut Siulittaasuata aamma Ministeriunerup isumaqatigiissuteqarnerannit, tunngavissinneqarput. Inatsisissatut siunnersuummut matumunnga Naalakkersuisut allannguutissatut siunnersuutaasa akuerineqarnerani, mittarfinnut ataatsimoortitanut aningaasalersueqataanissaq pillugu naalagaaffimmut isumaqatigiissutit pisariaqartut inaarsarnissaannut Naalakkersuisut piginnaatinneqartut, tassunga atatillugu Aningaasaqarnermut Akileraartarnermullu Ataatsimiititaliap isumaliutissiissummini oqaatigineqarmat, Naalakkersuisut naammagisimaartorujussuaat.

Tamatuma saniatigut isumaqatigiissutip immikkoortui allat, immikkoortoq inuussutissarsiornermi nutaamik suleqatigiinnermut tunngassuteqartoq ilanngullugu, Naalakkersuisut piviusunngortinniarlugit sulissutigissavaat.

Naalakkersuisut isumaat ersarippoq. Inuiaqatigiinni inuussutissarsiornermi periarfissarpasuit atorluarniarlugit siuariartortitsinerulernissaq periarfissaqarnissarlu kissaatigigutsigut, attaveqaqatigiinnermi pitsanngorsaanerit tamakku tunngavissaapput naleqquttut pisariaqartullu.

Siunnersuut aappassaanneerineqarnermini Inatsisartut Aningaasaqarnermut Akileraartarnermullu Ataatsimiititaliaannut innersuunneqarpoq.

Ataatsimiititaliap siunnersuut sukumiisorujussuarmik suliarivaa, Naalakkersuisunut ilaasortanik attuumassuteqartunik siunersiuinissamut aggersaasimalluni, aammalu isumaliutissiissuteqarluni. Tassunga atatillugu Naalakkersuisut naammagisimaarlugu maluginiarpaat, ataatsimiititaliami amerlanerussuteqartut siunnersuut tapersermassuk Naalakkersuisut qujassutigaat.

Matumuuna Inatsisartut oqallilluarnissaannik kissaappakka.